



28. Maj 2018

Oqaluuserisassani tullermut ikaarsaarnissamut Inatsisartuni Ingerlatsinermut Inatsimmi § 52 malillugu siunnersuut.

Inatsisartut inatsisaat nr. 6, 13. maj 1993-imeersoq naalakkersuisunut ilaasortat akisussaanagerat § 6 pillugu ersarilluinnartumik aalajangersagaq issualaariarlara:

§ 6. Naalakkersuisunut ilaasortaq § 10 naapertorlugu pineqaatissinneqassaaq piaaraluni imaluunniit mianersuaalliorujussuarnermigut Inatsisartut Naalakkersuisullu pillugit Inatsisartut inatsisaat inatsisilluunniit allat malillugit imaluunniit atorfimmi suunera malillugu imminut pisussaaffigisassanngortitaasut malillugit iliunngikkuni.

Imm. 2. Imm. 1-imi aalajangersagaq aamma atorneqartassaaq Naalakkersuisunut ilaasortaq eqqunngitsumik paasinerluutaasinnaasumilluunniit inatsisartunut paasissutissiisimappat imaluunniit inatsisartut oqaluuserisassamik oqaluuserinninneranni paasissutissanik oqaluuserisap inatsisartunit aalajangiiffigineqarnissaanut annertuumik pingaaruteqartunik nipangiussisimappat.”

Aningaasaqarnermut Naalakkersuisoq § 6 imm. 2 uani ataatsimiinnermi immikkoortoq 17 suliarineqarnerani unioqqutissimavaa.

Siunnersuutip isumaliutissiissutaani erserpoq Aningaasaqarnermut Naalakkersuisoqisumasioqateqarnermini ersarilluinnartumik saqqummiuppaa sulinermut ilanngaata Inatsisartut ukiaanerani ataatsimiinneranni saqqummiunneqassasoq, 2019-milu atuutilertussanngorlugu.

Ullumikkulli aappasaaneerinninnissaminut akissuteqaatimini ersarilluinnartumik oqaatigaa sulinermut ilanngaammut siunnersuut aatsaat 2019-mi saqqummiunneqarnissaa.

Oqaatigineqartut illuatungeriilluinnartutut isigaagut.

Demokraatit isaanniit Naalakkersuisutut ilaasortap Inatsisartut Inatsisaannik unioqqutitsinera imm. 6 13. maj 1993 Inatsisartunut ilaasortat akisussaassuseqarneranut tunngasoq aallaavigalugu Naalakkersuisup issiavimmini inissisimanissaa naleqqutinngilaq.

Demokraatit taakkartorneqartut aallaavigalugit pisariaqartitsipput oqaluuserisassani tullermut ikaarsaarnissami Aningaasarnermut Naalakkersuisoq pillugu tatiginninnginnermik taasititsisoqarnissaa siunnersuutigissallugu.